

Die goldisch Fassenacht

Jetzt, wo die goldische Fassenachtsdaache immer näher kumme, denk ich effderr mol zurigg onn den oone odder onnere Maskeball im Saal vumm Schitzehof. Bis isch zwonnsisch war habb isch mett dem doomolische MVF Musik uff de Bien gemachd, de Herbert meddem Saxofon, de Freddy odder de Günther omm Klavier unn isch omm Kontrabass, unn dess bis zu de Zeit, als isch geheirat habb. Awwer ob uff die Bien odder unne im Saal, Josses naa, was hawwe merr ferr enn Spass gehabbd! Doomols wars noch su, dass die Männer grad emol e bunt Hemd oogezoche unn heechsdens noch e Hütsche uffem Kobb hadde, awwer die Fraue hadde e Mask vorm Gesicht, su oo mett Bännel vorm Mund, die beim Sektdrinke hoch gehalle worrn sinn. Doo konnt merr als Geescheiwwer schnell emol gugge, ob merr die unner de Maske kenne dut odder nitt. Weil de gonse Owend hott merr mett onnern maskierte Fraue unn Mädcher gedonnsd, hott aach mett dene owwe in de Galerie, mir hawwe gesaad im Gepäcknetz, gesotze unn Sekt gedrunke, bis um zwölf, donn war Demaskierung unn von doo ab warn die Pärcher widder sesomme.

Awwer de Owend war noch nitt erum, weil monschmol hawwe all die, die noch im Saal ausgehalle hawwe, aach als die Musik nimmi gespilld hott, sisch mett Sektgläser unn Sektflasche in de Händ uff die Donnsläch gesetzd unn hawwe geschunkeld unn Lieder gesunge, die nitt immer juchendfrei gewese sinn. Wenn e Flasch leer war, iss ooner vorne onn die Thek gonge unn hott beim Singer Jakob unn soim Kättche e frisch Flasch geholld.

Ferr unser Kinner hadd die Fraa unn isch e jung Mädche aus de Verwondschaft in die Wohnung kumme losse, die hott de Kinner ebbes vorgelese unn sie späder ins Bett gebrochd, sie selbst hott sisch uff die Kautsch geleschd unn geschloofe, weil bis mir hoomgewaggeld sinn, war monschmol schunn die Nacht erum. Meisdens war joo Februar unn moins noch dunkel, awwer mir hawwe uns oigehenkt unn immer de Weesch hoom gefunne.

Isch waaß gar nitt, obs in Flerschem odder sunnst wo in de Näh noch Maskebäll gewwe dut, meistens sinns Kostümbäll unn die solle joo aach gons schee soi. Gern deet isch misch monschmol mett moine Freunde vunn doomols iwwer die alde Zeide unnerhalle, awwer vunn dene iss kooner mieh omm Lewe. Unn su dut die Erinnerung onn die Maskebäll genau su verschwinne wie aach de Schitzehof verschwunne iss.

Eiern Honnes